
Datganiad ar newidiadau i ofynion adrodd o ran rheoleiddio'r Post Brenhinol

Adolygiad o Reoleiddio'r Post 2022

Cynnwys

Pennod

1. Trosolwg

3

1. Trosolwg

Mae'r ddogfen hon yn nodi penderfyniadau Ofcom ar newidiadau i'r gofynion adrodd am reoleiddio a bennir ar gyfer y Post Brenhinol.

Cyhoeddwyd ein Datganiad Adolygiad o Reoleiddio'r Post ym mis Gorffennaf 2022. Mae'n disgrifio ein penderfyniad ar reoleiddio gwasanaethau post rhwng 2022 a 2027, gyda'r nod o sicrhau bod gan ddefnyddwyr y post fynediad at wasanaethau post syml, fforddiadwy a dibynadwy sy'n diwallu eu hanghenion; gan sicrhau gwasanaeth post cyffredinol sy'n gynaliadwy yn ariannol ac yn effeithlon; a chefnogi cystadleuaeth effeithiol mewn gwasanaethau post er budd defnyddwyr.

Fel rhan o'r penderfyniad hwn, bu i ni benderfynu cryfhau ein fframwaith monitro mewn perthynas ag adrodd ar gynladwyedd ariannol ac effeithlonrwydd y gwasanaeth cyffredinol. Bydd yn ofynnol yn awr i'r Post Brenhinol gyflwyno trosolwg blynyddol o gynladwyedd ariannol y gwasanaeth cyffredinol dros gyfnod o bum mlynedd. Bob pum mlynedd, bydd yn ofynnol hefyd iddo ddarparu rhagolwg cyfrinachol manwl sy'n cynnwys metrigau effeithlonrwydd penodol am gyfnod o bum mlynedd a chyhoeddi dau fesur o'i ddisgwyliadau effeithlonrwydd o'r rhagolwg hwnnw. Bydd yn ofynnol hefyd i'r Post Brenhinol gyhoeddi ei gynnydd yn erbyn y disgwyliadau hynny yn flynyddol. Bu i ni ymgynghori ym mis Medi 2022 ar sut i weithredu'r penderfyniadau hyn drwy ein gofynion adrodd i'r rheoleiddiwr, ac mae'r datganiad hwn yn cadarnhau sut y byddwn yn gwneud hynny.¹

Mae'r gofynion adrodd am reoleiddio a osodir ar y Post Brenhinol yn darparu'r wybodaeth sydd ei hangen arnom ar gyfer ein trefn fonitro, sy'n fesur diogelu allweddol o'n fframwaith rheoleiddio gwasanaethau post. Mae'r newidiadau yr ydym yn eu cadarnhau yn y datganiad hwn yn adeiladu i raddau helaeth ar y wybodaeth yr ydym eisoes yn mynnu i'r Post Brenhinol ei darparu. Rydym wedi defnyddio ymagwedd gymesur, gan ddileu gofynion pan fo hynny'n bosib ac yn briodol.

¹ Rydym hefyd wedi gwneud nifer fach o newidiadau eraill nad ydynt yn gysylltiedig â'n penderfyniadau yn Natganiad Gorffennaf 2022, er mwyn sicrhau ein bod yn parhau i dderbyn yr wybodaeth sydd ei hangen arnom gan y Post Brenhinol i gyflawni ein dyletswyddau mewn perthynas â chynladwyedd ac effeithlonrwydd, ac ar yr un pryd sicrhau bod y baich adrodd ar y Post Brenhinol yn gymesur.

Ein penderfyniadau – yn gryno

Rydym wedi penderfynu ei gwneud yn ofynnol i'r Post Brenhinol:

- **gyflwyno rhagolwg ariannol blynyddol i Ofcom sy'n ymdrin â chyfnod o bum mlynedd (y Rhagolwg Ariannol Blynyddol (AFF)).** Mae hyn yn disodli'r gofyniad presennol i ddarparu ei Gynllun Busnes Strategol a'i Gyllideb Flynyddol. Mae cynnwys yr AFF yn debyg i ofynion cynnwys presennol y Cynllun Busnes Strategol a'r Gyllideb Flynyddol. Fodd bynnag, ni phennwyd hyd rhagamcaniad y Cynllun Busnes Strategol, ac rydym yn awr wedi pennu bod yn rhaid i'r AFF fod yn 5 mlynedd o hyd ac wedi dileu'r gofyniad i gyflwyno metrigau effeithlonrwydd penodol yn flynyddol. Mae'n rhaid i'r rhagolygon hefyd gymryd canlyniadau gwirioneddol diweddaraf y Post Brenhinol i ystyriaeth a gweddu i'r cynllun busnes a gymeradwyir gan Fwrdd y Post Brenhinol ei hun, gan sicrhau bod ein gwaith monitro ar gynladwyedd ariannol y gwasanaeth cyffredinol yn seiliedig ar wybodaeth, amcanion a disgwyliadau diweddaraf y Post Brenhinol. Gan ddilyn adborth gan y Post Brenhinol, rydym wedi penderfynu newid y terfyn amser ar gyfer yr AFF o 31 Mai i 30 Mehefin bob blwyddyn.
- **cyflwyno rhagolwg ariannol i Ofcom bob pum mlynedd sy'n cynnwys gwybodaeth effeithlonrwydd allweddol am gyfnod o bum mlynedd (y Rhagolwg Ariannol Pum Mlynedd (FYFF)).** Bydd yr FYFF yn cael ei ddefnyddio fel meincnod y byddwn yn tracio cynnydd effeithlonrwydd y Post Brenhinol yn ei erbyn. Y terfyn amser ar gyfer y rhagolwg hwn fydd 30 Mehefin bob pum mlynedd.
- **cyhoeddi dau fesur o'i ddisgwyliadau effeithlonrwydd o'r FYFF, bob pum mlynedd, ac adrodd yn gyhoeddus ar gynnydd yn erbyn y disgwyliadau hynny ym mhob blwyddyn ddilynol.** Bydd un mesur (dadansoddiad PVEO (Pris, Maint, Effeithlonrwydd, Arall)) yn rhoi trosolwg lefel uchel o'i uchelgeisiau o ran effeithlonrwydd, a bydd y llall (Cynhyrchedd - WIPGH (Eitemau wedi'u Pwysoli yr Awr Crynswth)) yn rhoi cipolwg ar effeithlonrwydd gweithredol disgwyliedig ei staff rheng flaen. Bydd y disgwyliadau hyn yn galluogi rhanddeiliaid i weld barn y Post Brenhinol am ba gwmpas sydd ar gyfer mesurau effeithlonrwydd a meincnod ar gyfer mesur ei gynnydd. Bydd yn ofynnol hefyd i'r Post Brenhinol roi sylwadau ar ei gynnydd blynyddol, er mwyn i randdeiliaid ddeall y ffactorau sydd wedi effeithio arno.
- **parhau i adrodd ar ei berfformiad gwirioneddol yn rheolaidd i Ofcom** yn erbyn nifer o fetrigau, gyda rhai gofynion newydd a rhai newidiadau i fanylder yr wybodaeth sydd ei hangen a'r rheolau sy'n ymwneud â pharatoi gwybodaeth ategol. Bydd y newidiadau hyn yn sicrhau y gellir cymharu canlyniadau go iawn y Post Brenhinol yn uniongyrchol â'i ragolygon er mwyn i ni dracio cynnydd y Post Brenhinol yn gywir, a bod gennym yr wybodaeth sydd ei hangen arnom i ystyried cynladwyedd ariannol ac effeithlonrwydd y gwasanaeth cyffredinol.

Crynodeb lefel uchel wedi'i symleiddio sydd yn adran trosolwg y ddogfen hon. Mae'r penderfyniadau rydym wedi eu gwneud a'n rhesymeg wedi'u nodi yn y ddogfen lawn.

Bydd y newidiadau i'r gofynion adrodd yn dod i rym ar ddechrau blwyddyn ariannol 2023/24, sef 27 Mawrth 2023.